

Շարդէնի¹⁾ վկայութեամբ — որ վեց տարի ապրել է Պարսկաստանում եւ տաս տարի Արեւելքում — Օգոստինեանները Պարսկաստանում համարում էին Փորթուգալիայի ներկայացուցիչները, Կարմեւեանները՝ Պապի, իսկ Կապուչիններն ու Յիսուսեանները այնտեղ հաստատուեցին Փրանսայի յանձնարարականով եւ գտնուում էին Փրանսական պաշտպանութեան ներքոյ:

Եւրոպական միւս պետութիւնները եւս — գերմանական կայսրութիւնը, Վենետիկի հասարակապետութիւնը, Լեհաստանը եւս. — որոնց համար միսիոնարները պաշտօնական ներկայացուցիչներ չէին Պարսկաստանում, բայց եւ այնպէս ամէն կերպ հովանաւորում էին նրանց եւ աջակցում՝ հայերին հռովմէական եկեղեցու գիրկը դարձնելու: Նրանցից ոմանք մինչեւ իսկ այնքան հետու են գնում, որ հայերին դաւանափոխ անելը դարձնում են իրենց համար դործունէութեան նպատակ: Այսպէս, օրինակ, Լեհաստանի Եան Սօբեսկի թագաւորը (1624—96) պարսից Շահի մօտ է ուղարկում յատուկ յանձնարարական նամակով լեհահայ Պետրովիչին, «որի հայրենասիրութիւնը եւ իր հայերնակիցների հոգին փրկելու նախանձախնդրութիւնը նրան վերադարձրին Հայաստան, որ այնտեղ աշխատի իր ազգը միացնելու հռովմէական եկեղեցուն»: (Եգեան, «Պետրոս Մեծի յարաբերութ. եր. 14):

Այս տեսակէտից չափազանց ուշադրաւ է Փրանսական Լուդովիկոս 14-րդի քաղաքականութիւնը: Լուսաւորչական հայերին իրենց մայրենի եկեղեցու ծոցից դուրս քաշելու համար նա ոչ միայն հովանաւորում էր կաթոլիկ հայերին, այլ մինչեւ անգամ պարսից կառավարութեանը դրդում էր Լուսաւորչական հայերի դէմ: Իր բազմաթիւ նամակների մէջ նա խնդրում էր կառավարութեան առանձին ուշադրութիւնը դէպի կաթոլիկ հայերը, մանաւանդ դէպի եղբայրական հիմնարկութիւններն ու դպրոցները Շամախում, Երեւանում, եւ դէ-

պի Դոմինիկեանները՝ Նախիջևանում:

Յատկապէս նրա մէկ նամակը Շահաբասին — գրուած 1667 թ. յունիս 23-ին — շատ բնորոշ է այդ տեսակէտից: Աս խնդրում է Շահին՝ «արդարութիւն ցոյց տալ» կաթոլիկութիւն ընդունած հայերի նկատմամբ, հրատարակելով մի յատուկ օրէնք — ինչպէս Իմամ Ջաֆարի օրէնքը մահմեդականութիւն ընդունողների համար — որով Լուսաւորչական հայերը դրուելէին ժառանգութեան իրաւունքից՝ յօգուտ իրենց ընտանիքի այն անդամի, որը կաթոլիկութիւն է ընդունել: Բացի դրանից՝ խնդրում է նաեւ թեթեւացնել բոլոր կաթոլիկ հայերի հարկերն ու տուրքերը: Նամակը վերջացնում է նրանով, որ կաթոլիկ հայերը սպասում են այս «արդարութիւնը» Շահից եւ որ ինքն էլ շատ շահագրգռուած է այն առանձնաշորհրոմներով, որ կը տրուեն կաթոլիկ հայերին, որի համար նա ինքը չափազանց երախտապարտ կը մնայ դէպի Շահը (Եգեան, «Պետրոս Մեծի յարաբերութիւնները, եր. 14):

Պարզ է, որ Պարսկաստանը ուզենար ընդատաջ պիտի գնար Եւրոպայի, մանաւանդ Փրանսայի մեծ եւ հզոր թագաւորի ցանկութիւններին հէնց թէկուզ նրանց իր կողմը շահելու եւ իր թշնամի տաճիկների դէմը հանելու համար: Մէկ էլ՝ Պարսկաստանը շահագրգռուած էր Եւրոպայի, մանաւորապէս Փրանսայի հետ առեւտրական յարաբերութիւններ կապելու խնդրով. հետեւաբար ամէն կերպ պիտի աշխատէր Եւրոպական պետութիւնների համակրութիւնը վաստակել:

Դրա վրայ եթէ աւելացնենք նաեւ այն թանկագին ընծաներն ու կաշառքները — իսկ դուք գիտէք, թէ մինչեւ այսօր էլ նուէրն ու կաշառքը ի՞նչ կախարդական ոյժ ունին Պարսկաստանում — որ եւրոպական կառավարութիւններն ու իրենք միսիոնարները առատօրէն տալիս էին պարսից Շահերին եւ իշխանաւորներին, ապա միանգամայն հասկանալի կը լինի այն ազդեցութիւնը, որ վայելում էին կաթոլիկ հիմնարկութիւններն ու քարոզիչները Պարսկաստանում:

Ուրեմն, վա՛յ հայ լուսաւորչական եկեղեցուն եւ հայ լուսաւորչականներին:

Եւ յիրաւի իրենց այսքան զօրեղ զգալով, կաթոլիկ քարոզիչները յաճախ դիմում

1) Շարդէնը (1643—1713) Փրանսացի նշանաւոր ճանապարհորդ է ունի մի շարք ուսումնասիրութիւններ Արեւելքի մասին: Յատկապէս նշանաւոր է «Voyages en Perse et autres lieux de l'Orient»: